

錄。張道鴻年會同查勘。所有長洙百餘里土石橋梁各工程。均經李道履勘。安枕鋪軌。能開車者。已三十餘里。其餘七十餘里。年內一律均可通車。其款項除歷年贖路。及一應用項。建築經費。共去銀三百四十八萬七千餘兩外。尚存股款及周轉之款。共實銀九十六萬二千餘兩。至預算常年的款五百餘萬元。如租股係附入地丁抽收。已收去今兩年下上兩忙。鹽款係隨同課銀抽收。內配銷已收五年。口捐已收三年。米款優先股款。抽收均已歷五六年。三佛支路餘利。歷年均已實收。租股累進。及房股。均係諮議局列入議案。呈由撫部院核准。公布施行。無一虛擬款項。均已遵照鈞諭。分別開列清單。並按照鈞部頒發條款。詳細陳答。分交于李二道。回京面呈云云。

粵省路事述聞(詹京卿約法三章)

粵省鐵路公司。於四月初一日開會選舉總協理。詹京卿天佑得票最多。粵省股東。亦甚欲得詹京卿為總理。詹京卿旋具呈郵傳部。略言天佑於本年七月十二日。在宜昌

川路工次。奉到鈞部電開。頃接廣東京官公函。稱粵路總理。股東公舉詹天佑充當。請速派。如慮詹君不暇兼顧。請其到粵兩月。復勘全路。指揮既定。布置妥當。便可交協理董事遵守。遇有要事。仍函電諮詢。想詹君顧念桑梓。當亦樂從等情。天佑再四籌維。現值張綏川漢兩處工程正當吃緊之際。天佑不量鷲鈍。勉力兼營。私衷尙虞覆餗。儻再加以粵省路事。即責任愈重。諸務日繁。微特一人之才力不逮。而且三路窳遠。必須終年奔馳於東西南北之間。更恐貽誤滋多。惟有擬懇賞准開去京張張綏川漢等處路工兼差。俾得常川駐粵。一志經營。庶幾稍捐叢脞。抑尤有進者。向聞粵路疑謗叢生。風潮迭起。胥由於事權過濫。黨論太多。誠不啻一國三公。十羊九牧。無怪敗壞公益。已至不可收拾。第思天佑承乏京張。設非列憲推誠。流言莫感。員司効命。猜忌悉捐。亦斷難百端待理。速底於成。今承粵路選舉。凡素愛天佑者。無不交相勸阻。即天佑鑒於前車。亦本視為畏途。奈梓里攸關。未便知難終避。倘蒙俯准奏

派前往。尙求預爲約法三章。一則凡粵路所有股款。須速一律交出。統歸公司總收支處。妥爲存放生息。旁人不得越俎過問。二則凡關於全路支款用人。以及工程購料各事宜。應歸天佑隨時主持。股紳不得干預掣肘。三則凡經天佑所辦全路興革各事。均自擔其責任。勿許旁參未議。縱有欠當之處。亦須俟屆一年期滿。刊布報告時。始准任憑公衆評論。如平日有敢仍前造謠反對者。各股紳應卽協力維持。查明嚴懲。似此數端。若股紳信從認可。天佑或堪盡心竭力。勉爲其難。否則莫敢應選。請飭另舉賢能。並非冀攬全權。過事要約。蓋當霉爛之餘。舍此實無善策以資整頓。必仍難期補救於萬一也。云云。

郵傳部據呈後。當飭由籌辦處電告粵路公司。詢問粵路各股東對於詹京卿所約三事。是否認可。聞各股東均無不贊成云。

記英使反對廣東牌照捐事

粵省辦理牌照捐一案。粵督主持甚堅。迭經電商外部。而

外部終慮外人不服。力主停辦。茲錄其最近往來電文如下。

袁督致外務部電 粵省牌照捐。每膏一兩。抽銀三毫。以三個月爲一期。第就現在每兩抽捐三毫計算。每箱四十顆。每顆四十八兩。折半成膏。一箱可捐至二百八十元。照上年進口洋藥一萬八千五百餘箱。當收捐銀四百四十餘萬圓。收捐之數。按期加增。吸煙之人。逐期減少。相銷相抵。雖不能作爲經常歲入。三年之內。所收當不少。蓋非膏價日昂。則沾染嗜好者。無所激刺。外人加稅之說。係另一問題。如爲全國統籌。粵固不能獨異。若因粵辦膏捐而遽然應允。轉恐其以言餽人。而授以重征洋藥之口實。且純乎籌款性質。於禁煙宗旨。未免毫釐千里。卽就籌款論。向來進口洋藥。釐稅並征。每箱祇收一百一兩。現雖儘力磋商。稅釐再加一倍。亦尙不逮目前開收膏捐之數。且加稅必訂條約。一經議定。再不能逐步加增。於自由禁煙。實多妨礙。在沉迷煙毒者。亦易起遲疑觀望之心。寓禁於征。鈞